

Adat Lalu Di Hadapan Tetamu

Oleh : NORDIN SAAD



Adat lalu di hadapan tetamu..... membongkok dan menghulurkan tangan kanan ke bawah

Kunjung-mengunjung atau ziarah-menziarahi sudah menjadi satu amalan dalam masyarakat kita.

Amalan ini bukan saja dilakukan untuk menziarahi seseorang anggota keluarga yang sedang sakit, tetapi juga bertujuan untuk mengeratkan lagi hubungan di kalangan ahli keluarga dan jiran tetangga. Malah, amalan ini juga dapat memberikan peluang kepada anggota keluarga yang masih muda atau tinggal berjauhan mengenali sanak saudara mereka sendiri.

Dengan cara ini, hubungan di antara ahli-ahli keluarga tidak akan renggang atau terputus apabila berlaku kematian di kalangan anggota keluarga yang telah tua.

Semasa berkunjung ke rumah sanak saudara atau ahli keluarga, biasanya pengunjung akan diraikan di ruang tamu ataupun ruang yang disediakan khas untuk tetamu seperti serambi rumah, beranda ataupun ruang tamu.

Tuan rumah biasanya akan memastikan tetamunya berada dalam keadaan selesa dengan memastikan serambi, beranda ataupun ruang tamu rumahnya sentiasa bersih, teratur dan diserikan dengan berbagai-bagai barangan hiasan. Pengunjung dan tuan rumah biasanya akan berbual atau berbincang tentang sesuatu perkara di ruang yang dikhaskan ini.

Kebanyakan rumah di dalam masyarakat kita sekarang ada menyediakan kemudahan sofa atau kerusi di ruang tamu untuk para tetamu mereka. Walau bagaimanapun, jika para pengunjung yang datang menziarahi itu melebihi daripada tempat yang disediakan, maka kebiasaannya para tetamu tidak akan menggunakan sofa atau kerusi yang tersebut.

Apabila para pengunjung tidak menggunakan sofa atau kerusi, tuan rumah juga akan turut bersama dengan tetamunya duduk di lantai. Adalah dianggap kurang manis, jika sebahagian daripada kita menggunakan sofa ataupun kerusi sebaliknya sebahagian lagi hanya duduk di lantai.

Para pengunjung dan tuan rumah biasanya akan duduk dalam bulatan atau berhadapan untuk memudahkan komunikasi dan membolehkan mereka berada dalam keadaan yang selesa. Semasa sedang berbual atau berbincang ini, adakalanya terdapat ahli keluarga ataupun tetamu yang baru datang terpaksa melintasi tempat para pengunjung dan tuan rumah ini

berbual. Walaupun perbuatan melintasi tempat seperti ini biasanya dilarang terutamanya bagi kanak-kanak tetapi ianya masih dibenarkan jika memenuhi peraturan atau adat-adatnya.

Di antara adat yang diamalkan apabila seseorang itu ingin melintasi para tetamu yang berada di ruang tamu ataupun di tempat lain ialah dengan cara meminta izin terlebih dahulu.

Orang yang ingin melintasi kawasan tersebut akan berkata 'minta lalu', 'maafkan saya' atau 'tumpang lalu' sambil membongkokkan badan dan menundukkan kepalanya.

Ketika membongkokkan badan ini, tangan kanannya akan direndah atau dihulurkan ke lantai sambil bergerak perlahan-lahan dan berhati-hati. Adalah dianggap kurang sopan, jika seseorang itu melintasi para tetamu tanpa meminta izin terlebih dahulu atau melintasinya dengan tergopoh-gapah. Ahli-ahli keluarga seharusnya menunjukkan keramahan dan kebaikan hati mereka kepada para tetamu.

Oleh itu, seboleh-bolehnya elakkan diri daripada menunjukkan reaksi yang tidak menyenangkan para tetamu. Sebenarnya dengan mengamalkan adat kesopanan ini dapat melambangkan betapa masyarakat kita amat menghormati para tetamu yang berkunjung ke rumah.

Kedatangan atau kunjungan seperti ini dianggap sebagai satu penghormatan masyarakat terhadap tuan rumah sekeluarga.

